

Lecturer's Contribution

Misi Pasca Banjir Pasukan UiTM Cawangan Pulau Pinang ke Selangor

Oleh Noor Azli Affendy Lee



“Pada hari Sabtu (18 Disember 2021) apabila saya nak keluar ke surau untuk solat Subuh, saya turun tangga, air dah penuh dah... Balik tengok, air makin lama makin naik. Air, sampai tengahari tu, dah di paras lutut.... Percubaan menyelamatkan barang masa tu tidak ada lagi sebab kita tak jangka akan naik lagi... biasanya takat tertinggi di paras lutut ... Petang Sabtu tu dah ke paras pusat... memang tak berani nak masuk (rumah) dah.”

Begitulah secara amnya jawapan salah seorang mangsa banjir di Taman Seri Muda, Shah Alam, yang merupakan bilal surau kawasan tersebut. Walaupun kawasan tersebut sering berlaku banjir setiap tahun, namun ini adalah kali pertama banjir yang berlaku amat serius hingga ada yang ke tahap bumbung rumah dan bas.

Misi Pasca Banjir Pasukan dari UiTM Cawangan Pulau Pinang (UiTM CPP) yang terdiri daripada 8 orang staf (akademik & bukan akademik) serta 28 orang pelajar (ijazah muda, diploma dan pra diploma) sampai di UiTM Shah Alam pada 26 Disember 2021 dan diberi penempatan di Kolej Teratai (bagi lelaki) dan Mawar (bagi perempuan). Bantuan dilakukan secara fizikal dan diketuai oleh Unit Polis Bantuan dan Jawatankuasa Operasi Bencana Negeri (JOBN) UiTM CPP dengan kerjasama UiTM Shah Alam, terutamanya para mahasiswa/mahasiswi daripada Majlis Perwakilan Pelajar (MPP) UiTM Shah Alam.

Dengan kelengkapan seperti *water jet*, penyapu berus, penolak air, penyodok longkang, dan paip air getah yang dipinjam daripada Unit Ko-kurikulum UiTM Shah Alam, misi pasca banjir pasukan sukarelawan UiTM Cawangan Pulau Pinang dihantar ke Taman Seri Muda, Shah Alam pada hari Isnin (27 Disember 2021) dan ke Sekolah Kebangsaan Bukit Changgang, Banting pada hari Selasa (28 Disember 2021).



Pada hari Isnin, pasukan UiTM CPP tiba di kawasan Taman Seri Muda pada pukul 10 pagi. Bukan bukit menghijau yang kami nampak tetapi timbunan sampah yang merupakan alatan, perabot, perkakasan, pakaian dan lain-lain yang musnah atau rosak akibat "muntahan" daripada setiap isi rumah dan lot kedai yang terjejas teruk. Kaki lima dan jalan-jalan masih terdapat kesan-kesan warna keperangan akibat lumpur banjir dan baunya apatah lagi. Kendaraan seperti kereta, van, lori dan bas terdampar di kaki jalan, dipenuhi tanda-tanda air lumpur dari atas ke bawah. Melihat daripada posisi dan keadaan kereta di

jalan, ada yang terbukti telah hanyut akibat banjir dan ada juga yang telah dilanggar oleh bot bantuan semasa air masih di paras yang agak tinggi.



Alhamdulillah, dengan khudrat yang ada, kami membentuk tiga buah pasukan untuk membantu membersihkan kawasan awam seperti kaki lima blok kedai yang berhampiran dan beberapa buah rumah di sekitarnya. Ada juga tuan kedai yang meminta kami untuk

membantu mengangkat barang-barang rosak yang perlu dilupuskan dan juga mencuci perkakasan kedai yang masih boleh diguna semula. Dalam membantu membersihkan rumah-rumah mangsa banjir, terdapat sebuah rumah yang didiami oleh bekas staf UiTM CPP yang kini bertugas di UiTM Shah Alam. Selain itu, pasukan UiTM CPP juga dipanggil untuk membantu membersihkan rumah tuan bilal kawasan tersebut dan juga sebuah rumah yang didiami oleh sepasang warga emas.

Pada hari Selasa, Misi Pasca Banjir Pasukan Sukarelawan UiTM CPP diteruskan di Sekolah Kebangsaan Bukit Changgang, Banting, Selangor Darul Ehsan. Pasukan kami diberi tugas untuk membersihkan 3 bilik taska di belakang sekolah yang berada di kedudukan tanah yang lebih rendah. Banyak peralatan dan perabot rosak teruk, jadi kami membantu para wanita pendidik taska untuk mengeluarkan semua barang (perabot, kerusi, meja, alatan lain, dan sebagainya) ke luar taska untuk dijemur atau dikumpulkan untuk pelupusan. Setiap kumpulan menggunakan *water jet* dan peralatan pembersihan lain untuk membersihkan lantai setiap bilik dan juga dapur staf.

Alangkah terkejutnya kami apabila membuka pintu bilik stor di dapur staf taska. Disebabkan tiada lubang untuk air keluar dan terdapat penghalang simen di pintu bilik, air banjir masih lagi bertakung di dalam bilik stor yang dipenuhi dengan perabot dan peralatan taska yang banyak. Bau dan wap yang dikeluarkan amatlah busuk. Kami yang membantu setengah hari pun ada yang tidak tahan dan muntah semasa mengeluarkan barang-barang daripada bilik tersebut. Bayangkan keadaan mangsa-mangsa banjir yang perlu menghadapi kesan-kesan banjir dan membersihkan rumah, kedai atau tempat masing-masing yang telah seminggu dilanda banjir.

"Bulat air kerana pembetung, bulat manusia kerana muafakat", begitulah ungkapan yang boleh diberikan ketika ini. Tenaga kerja dan khudrat bagi membantu mempercepatkan proses pembersihan untuk mangsa banjir ini amatlah diperlukan dan patut diberikan keutamaan. Begitu juga dengan bantuan wang ringgit yang boleh disalurkan kepada mana-mana badan yang dilantik. Bukan mudah bagi mangsa untuk bangkit seperti sedia kala.



Sebahagian penulisan ini diambil daripada laman sesawang Facebook Rektor UiTM Pulau Pinang di <https://www.facebook.com/rektor.uitmcpp> (Disember 26, 29 dan 30, 2021).